

यूसुफक काँथ

यूसुफाँक स्वीण

(उत्पत्ति ३७:१-११)

याकूब हारान देश मिं आपण मम लाबानक पास गो और वीक दगाड़ रुण लागौ। वीक द्वी चेली छी। याकूब नॉन चेलिक दगाड़ प्रेम करछी और वीक दगाड़ ब्या करण चाछी, लेकिन लाबानल वीक ब्या ध्वकल आपण तुलि चेलिक दगाड़ करि दे। आखिरकार याकूबल द्विवै बैणियोंक दगाड़ ब्या करौ, लेकिन उ नॉनवालि स्वैणि कै जादे प्यार करछी। तुलि वालिक नॉनतिन हई, लेकिन नॉन वालिक नि हाइ। पर यैक भौत बखत बाद नॉन वालिल लै एक च्यल कै जनम दे, और उनुल वीक नाम यूसुफ धरौ। याकूब यकै भौत प्रेम करछी। यैक बाद वील एक और च्यल कै जनम दे लेकिन उकै जनम दिण बखत उ मरि गई। याकूबाँक एल बार च्याल और एक चेलि छी।

यौ याकूबक परिवारक काँथ छु। उ हारान देश मिं ब्या करिबेर फिर कनान देश मिं रुण लागौ, जां याकूबक बौजू इसहाक बसी छी।

याकूबक च्यल यूसुफ सत्र सालक लौंड छी। उ आपणि सौति भैनोंक दगाड़ भेड़-बकारोंक ग्वाव छी। यूसुफ आपण बौजू कै आपण सब भैनोंक खराब कामोंक बारि मिं बतुँछी।

याकूब उकै सब च्यालों है जादे प्यार करछी, किलैकि उ वीक बुढ़ापाक च्यल छी। और यौ कारणल याकूबल वीक लिजी एक लम्ब और कीमति कपड़क कुर्त बणवाछी।

जब यूसुफक और भैनोंल देखौ कि उनर बौजू सबों है जादे प्यार यूसुफ कै करुं, तब उं सब यूसुफ देखि जलन करण भैटीं। और वीक दगाड़ भली कै बात लै नि करछी।

एक दिन यूसुफल एक स्वीण देखौ। वील आपण भैनों धैं कौ, "सुणो, मील एक स्वीण देखौ। हम सबै एक दगाड़ गड़ मिं ग्योंक आठ बादणाछी तब तुमार सब आठौल म्यर आठ कै चारों तरफ बे चौड़ हबेर पैलाग करौ।" तब वीक भैनोंल कौ, "तु के सोचणौछै, कि तु रॉज बणिबेर हमु मिं हुकूमत करलै?" और यूसुफक यौ स्वीणक कारणल भैनोंल वीक दगाड़ और लै जादे जलन करण भै गयाय।

वीक बाद यूसुफल आपण भैनों कै एक दुसर स्वीणक बारि मिं आइ बता। वील कौ, "मील देखौ कि सूरज, चांद और इग्यार तॉर, सब मिंकै चौड़ हबेर पैलाग करणाछी।" लेकिन जब यूसुफल यौ बात आपण बौज्यू कै लै बतै, तब वील कौ, "यौ कस किसमक स्वीण छु? के तुकै तेरि इज, मी और त्यार इग्यार भै पैलाग करुला?" यूसुफाँक भै वी देखि हर बखत जलन करनै रई, लेकिन वीक बौज्यूल यौ सब बातोंक अर्थ समझणक लिजी भौत गैल दिमागल सोचौ कि यैक सही अर्थ के हवल।

यूसुफाँक भै उकै बेचनी

(उत्पत्ति ३७:१२-३६)

यूसुफाँक भै आपण बौज्यूक भेड़ों कै चरूणक लिजी एक दिन शकेम जाँग गई। वीक बाद यूसुफ धैं वीक बौज्यूल कौ, "त्यार भै म्यार भेड़ोंक दगाड़ शकेम मिं छन। तु उनरि खबर करणक लिजी जा और लौटिबेर वांक खबर मिंकै दिये।" यूसुफल कौ, "होई, मी जानू।"

शकेम मिं एक मैसल उकै इथां-उथां फेरीन देखौ। तब उ मैसल पुछौ, "तु के चाणौछै?" यूसुफल कौ, "मी आपण भैनों कै चाणयू। के तुम बतै सकछा कि उ हमार भेड़ोंक दगाड़ कां छन?" उ मैसल कौ, "उं तो यांबे पैलियै न्है गई। मील सुणौ कि उ दोताना नामक जाँग मिं जाणी छी।" तब यूसुफ दोताना गो।

यूसुफाँक भैनोंल उकै दूर बे उण देखिबेर मारणक इरॉद बणा। उनुल आपस मिं कौ, "देखो, तौ स्वीण देखणी यूसुफ उणौ! जस्सै मौक लागल, हम तकै मारिबेर तैक लाश कूं मिं खिति द्यूल। और हम आपण बौज्यू धैं कै द्यूल कि उकै क्वे जंगली जानवरल मारि हैलौ। इसिक वीक स्वीण लै झुट है जॉल।" लेकिन रूबेनल, जो वीक सबों है ठुल भै छी, यूसुफ कै बचूणक मंशाल अनुधैं कौ, "हम उकै नि मारुल बल्किन ज्यूनै उठैबेर कूं मिं खिति सकनू।" वील आपण मन मिं सोचौ कि मी यकै इनुबे बचैबेर वापिस बौज्यूक पास घर लगूल।

यूसुफक आपण भैनोंक पास पुजण तलक वीक भैनोंल जबरदस्ती वीक हात पकड़िबेर वीक भलौ कुर्त खोलिबेर उकै सुकी कूं मिं खिति दे।

और वीक बाद जब यूसुफाँक भै खाँणक लिजी भैटीं, तब उनुल ब्यापारियोंक एक दल उण देखौ जो मश्याल, इत्र और धूप लिबेर मिस्रक तरफ जाणाछी। तब वीक भैनों मिं बे एक जैक नाम यहूदा छी वील आपण दुसॉर भैनों धै कौ, "अगर हम यूसुफ कै मारंल, वील हमुकै के फैद ह्वल? यौ हबेर तो यौ ठिक रौल कि हम उकै ब्यापारियों कै बेचि दिंनू। हमुकै उकै नि मारण चैन, किलौकि उ लै हमरै भै छु।" यौ बात सुणिबेर सब भै राजि है ग्याय। जब ब्यापारी नजिक पुर्जी तब उनुल यूसुफ कै कूं बे भ्यार निकालिबेर उकै बीस चांदिक सिक्कों मिं उनुकै बेचि दे, और उ उकै आपण दगाड़ मिस्र ली गई।

यौ सब काम हुण बखत रूबेन आपण भैनोंक दगाड़ वां नि छी। जब उ वापिस कुंवक पास आ और वील यूसुफ कै वां नि पाय तब यौ कारणल वील आपण लुकुड़ फाड़ि देई। रूबेनल आपण भैनोंक पास जैबेर कौ, "यूसुफ कुंवक पास न्है, आँब मी के करूं?"

तब यूसुफक भैनोंल बकरक खून वीक कुर्त मिं लगै दे। और उनुल घर ऐबेर उकै आपण बौज्यू कै दिखैबेर कौ, "हमुकै यौ कुर्त मिलौ, के यौ यूसुफक छा?" उनर बौज्यूल उ कुर्त कै पछ्याण ले और कौ, "यौ वीकै छु। म्यर च्यल कै क्वे जंगली जानवरल खै है!"

याकूब आपण च्यल यूसुफक लिजी इतुक जादे दुःखी हौ कि वील आपण पैरी लुकुड़ फाड़िबेर टाट ओड़ ले। इसिकै उ भौत लम्ब बखत तलक वीक शोक मिं डुबी रौ। वीक और च्याल-चेली सबोल उकै समझूणक भौत कोशिश करी, लेकिन याकूब कै क्वे लै बातल शांति नि मिली। वील कौ, "मी आपण च्यलक शोक मरण तलक मंनूल।"



यूसुफ एक गुलामक रूप मिं

यूसुफ मिस्र पुजुं

(उत्पत्ति ३६:१-२३)

ब्यापार करणी मैस यूसुफ कै खरीदिबेर मिस्र मिं ली गई, और मिस्री महलक सिपैनोंक सैप कै बेचि दे। लेकिन प्रभु परमेश्वरल वां लै यूसुफक

मधत करी। जब वीक मालिक पोतीपरल देखौ कि प्रभु परमेश्वर यूसुफक हरेक काम करण मिं उकै सफल बणूणी, तब उ भौत खुशि छी, और वीक हरेक चीजोंक देखभाल यूसुफ करछी। तब बटी प्रभु परमेश्वरल यूसुफक कारणल पोतीपरक घर, गाँड़-भिड़ और हरेक चीजों मिं आशीश दे।

यौ देखिबेर पोतीपरल आपण घरक हरेक चीजक जवाबदारी यूसुफ कैं सौप दे। उ आपण खॉणक अलावा और के चीजक फिकर नि करछी।

यूसुफ डील-डौल और देखीण-चाण मिं भलौ छी। पोतीपरकि स्यैणि उकैं प्यार करण लागी। और एक दिन वील यूसुफ धैं यकलै मिं कौ, "आ, आज तु और मी एक दगाड़ पड़नू।" लेकिन यूसुफल यौ कैबेर मना करि दे, "बाप रे बाप, मी यस नि करि सकन किलैकि म्यर मालिक आपण घरक बारि मिं मि पर पुर भरौस करुं, और वील आपण घरकि हरेक चीजक अधिकार मिंकें दी रॉखौ। और यैक अलावा वील आपण घर मिं मिंकें आपण बराबरक दर्ज दी रॉखौ। लेकिन मिंकें वीक स्यैणिक दगाड़ नि सितण चैन। यौ खराब बात छु और परमेश्वरक हुकुमक खिलाफ लै छु।" यूसुफकि मालकिन वीक दगाड़ रोज-रोज बात करछी लेकिन यूसुफ नि मानछी।

लेकिन जब एक दिन यूसुफ काम करणक लिजी वीक घर भितेर गो, उ बखत वां और क्वे तिसर आदिम नि छी। यौ देखिबेर वीक मालकिनल वीक कुर्त पकड़िबेर कौ, "आ, म्यर दगाड़ पड़!" तब यूसुफ आपण कुर्त वीक हात मिं छोड़िबेर वांबे भाजि गोय। पर वीक बाद उ स्यैणिल आपण दुसॉर दासों कैं बुलैबेर कौ, "देखो, यौ दासल भितेर ऐबेर म्यर दगाड़ जबरदस्ती करणकि कोशिश करी। लेकिन मील जोरल हाल्ल करि दे, और तब उ डरिल आपण कुर्त म्यर हात मिं छोड़िबेर भाजि पड़ौ।"

और जब वीक बैग घर आ, तब वील उकैं लै यौ झुटि बात बतै। जब यूसुफक मालिकल आपण स्यैणिक बात सुणी तब उकैं भौत रीश ऐ। और वील यूसुफ कैं जेल मिं बन्द करि दे। लेकिन प्रभु परमेश्वरकि दया यूसुफ मिं जेल मिं लै छी। यैक लिजी जेलक मुखियाल सब कैदियों कैं यूसुफ कैं सौप देई, और उं जेल मिं यूसुफक हुकुमल काम करछी। और जेलक उ मुखिया सब कामक लिजी यूसुफ मिं भरौस करछी। और जो काम यूसुफ करछी उकैं सफल बणूण मिं परमेश्वर वीक मधत करछी।

यूसुफ कैदियोंक स्वीणक अर्थ बतू

(उत्पत्ति ४०)

यैक बाद रॉजक र्वट पकूणियल और अंगूरक रस दिणिवाँल दुसर प्रधानल आपण मालिक कै नराज करि दे। यैक लिजी वील उं द्विनों कै जेल मिं खितौ। और वांक मुखियाल उनुकै यूसुफक देखभाल मिं धरौ।

जब भौत बखत है गोय, तब एक रात उं द्विनोंल अलग-अलग स्वीण देखीं। राति पर यूसुफ उनर पास गो। जब वील देखौ कि उं परेशान है रई, तब वील उनुधै पुछौ, "तुम इदुक परेशान किलै देखीणाछा?" उनुल जबाब दे, "बेई ब्याव हमुल स्वीण देखौ, पर यां उनर अर्थ बतूणी कवे न्है।" यूसुफल कौ, "के यौ सांचि न्हैती कि स्वीणक अर्थ बतूणक काम सिरफ परमेश्वरक छु? तुम आपण स्वीण मिं कै बताओ।"

तब अंगूरक रस दिणी वॉलल आपण स्वीण यूसुफ कै बता। वील कौ, "मील स्वीण मिं देखौ कि म्यर सामण एक अंगूरक लगिल छु। और उ मिं तीन फाड छिन। और उं फाड मिं मील फूल लागण और अंगूर बणिबेर पाकण देखीं। और मील अंगूरक रस कप मिं निकालौ और उकै रॉज कै दे।"

तब यूसुफल कौ, "त्यर स्वीणक अर्थ यौ छु कि उं तीन फाड तीन दिन छिन। तीन दिनक बाद रॉज दुबार तुकै त्यर पद सौप द्यल। और तु पैलियक चारि फिर उकै अंगूरक रस द्यलै। यैक लिजी मी तुधै गुजारिश करनू कि जब तुकै त्यर काम वापिस मिलि जॉल, तब तु मिं कै याद धरिये और तु म्यर बारि मिं रॉज कै बताये और मिं कै यौ जेल बे भ्यार निकलवै दिये। किलैकि सांचि मिं मिं कै इब्रानियोंक देश बे दास बणाई गो, और मी बिन के गलतिक जेल मिं छूं।"

जब र्वट पकूणियल देखौ कि स्वीणक अर्थ भल छु तब वील यूसुफ धै कौ, "मील लै एक स्वीण देखौ। मील देखौ कि म्यर ख्वर मिं तीन डॉल छिन। सबों है मेलिक डॉल मिं रॉजक लिजी हरेक अलग-अलग किसमक र्वाट छिन, लेकिन प्वथील उकै चुनि-चुनिबेर खाणई।" तब यूसुफल उकै जबाब दे, "त्यर स्वीणक अर्थ छु कि उं तीन डॉल लै तीन दिन छिन। आज बे तीन दिनक बाद रॉज तेरि मुनइ काटिबेर लाश कै बोट मिं लटकै द्यल। और प्वथील त्यर मांश चुनि-चुनिबेर खॉल।"

तिसर दिन रॉजक जनम दिन छी, और वील आपण सब कामदारों कै दावत दे। वील अंगूरक रस दिणिवाँल और र्वट पकूणी कै जेल बे भ्यार

निकालौ, और वील अंगूरक रस दिणी नौकर कैँ दुबार वीक काम सौप दे। लेकिन जस यूसुफल र्वट पकूणी कैँ बतै रॉखछी वीक हाल उस्सै हौ। रॉजल वीक गर्दन कटैबेर उकैँ बोट मिं लटकै दे।

पर अंगूरक रस दिणिवाल रॉज कैँ यूसुफक बारि मिं बतूण भुल गोय।

रॉज स्वीण देखुं

(उत्पत्ति ४१:१-१३)

द्वी सालक बाद मिस्रक रॉजल एक स्वीण देखौ, कि उ नील नामक गाड़क किनार मिं ठाँड़ हैरौ। तब वील स्वीण मिं गाड़ भितेर बे सात गोरु कैँ उण देखौ, जो हट्ट-कट्ट और देखीणाँक जबरदस्त छी। और उ किनार ऐबेर घा चरण लागीं। वीक बाद सात दुसोर गोरु गाड़ बे भैर निकलिबेर पैलिवाल गोरुक दगाड़ ठाँड़ हई। लेकिन यौँ गोरु दुबाव और देखीण मिं बेकार छी। यौँ सात दुबाव-पताव गोरुल भॉल मोटि गोरु कैँ खै दे। तब रॉजकि नीन टुटि पड़ी।

लेकिन रॉज फिर सित गोय। वील नीन मिं दुबार स्वीण मिं देखौ कि सात अनाजॉक लम्ब-चौड़ बालड़ यकैँ बोट बे ऐ रई। और उनार पछिल बे सात मरियल और वैलाई जाँस बालाड़ निकलीं। तब मरियल बालड़ोंल भॉल बालड़ों कैँ खै ले। वीक बाद रॉज बिज गोय।

यौँ स्वीणक कारणल रॉज भौत परेशान छी। वील सब जाणणी-सुणनियों कैँ बुलैबेर उनुकैँ आपण स्वीण बता, पर कवे लै उनर ठिक अर्थ नि बतै सक।

तब रॉजक अंगूरक रस दिणी नौकर कैँ यूसुफकि याद ऐ। वील रॉज धैँ कौ, "जो म्यर दगाड़ हौ, मिंकैँ याद उणौ। जब तुम हम द्वी पधानों देखि गुस्स है राछिया और तुमुल हम द्विनों कैँ जेल मिं खिति रॉखछी, तब हम द्विनोंल स्वीण देखौ। वां हमर दगाड़ एक हिब्रु लौंड छी, जो पैली सेनाक सैपक नौकर छी। हमुल उकैँ आपण स्वीण बता, और वील हमुकैँ वीक अर्थ समझा। जस वील हमुकैँ स्वीणक अर्थ बताछी, उसै हौ। जस वील कौछी, मिंकैँ आपण पद वापिस मिलौ और र्वट पकूणी कैँ बोट मिं लटकाई गो।"

यूसुफ रॉजक स्वीणक अर्थ बतूं

(उत्पत्ति ४१:१४-३७)

तब रॉजल यूसुफ कैँ बुलवा और उं जल्दी यूसुफ कैँ जेल बे भ्यार ल्याई। यूसुफ बाव बणैबेर और लुकुड़ बदइबेर जल्दी रॉजक पास आ। तब रॉजल

यूसुफ धैं कौ, "मील एक स्वीण देखौ, लेकिन वीक अर्थ बतूणी क्वे न्हैं। मील त्यर बारि मिं सुण राँखौ कि तु स्वीणक अर्थ बतूछै।" यूसुफल राँज कै जबाब दे, "ना, मी नि जाणन, लेकिन परमेश्वरक जरियल मी तुमुकैं वीक ठिक-ठिक जबाब दी सकनू।" तब राँजल आपण स्वीण यूसुफ कै बताई।

वीक बाद यूसुफल राँज धैं कौ, "तुमार द्विवै स्वीणोंक अर्थ यक्कै छु। सात भॉल गोरु, सात साल और सात ग्योंक बालाड़ लै सात भॉल साल छन। यैक अलावा सात मरियल गोरु और वैलाई बालाड़ वीक बादोंक अकालक सात साल छन। परमेश्वर जो काम करणिवॉल छन उकैं उनुल तुमुकैं दिखै है। आँब पैली सात साल याँस आल, जमिं पुर देश मिं भौत अन्न पैद ह्वल। लेकिन वीक बाद सात सालक लिजी अकाल पड़ौल जो पुर देश कै खतम करि द्यल। यौ अकालक कारणल पुर देशक अन्नक के पत्त नि चलल, किलैकि यौ बखत मिं कै के लै पैद नि ह्वल। तुमुल द्वी बार एक स्वीण यैक लिजी देखौ कि परमेश्वरल यौ बात पक्क तय करि है और उ जल्दी यौ करॉल।

आँब तुम जल्दी एक समझदार मैस कै पुर देशक जवाबदारी सौपो। और वीक अलावा तुम अलग-अलग मैसों कै पुर मिस्र देश बे अन्न जॉम करणक लिजी छांटिया, जो हरेक मैसों धैं उं सात भॉल सालों मिं जो अन्न पैद हो, वीक पचूं हिस्स जॉम करो। यौ मैसों कै आदेश दिया, कि उ अन्न गोदामों मिं जॉम करिया। और यौ अन्न कै तब तलक बचाई जाओ जब तलक अन्न पैद हुणौ। फिर जब सात साल तलक अकाल पड़ौल तब यौ अनाज काम आल। और इसिक देश बर्बाद हुण है बचि जॉल।"

यौ राय राँज और वीक सब दरबारियों कै भलि लागी।

यूसुफ उप-राँज बणुं

(उत्पत्ति ४१:३८-५७)

राँजल आपण दरबारियों धैं कौ, "के हमुकैं यौ मैसक चारि जमिं परमेश्वरक आत्मा बास करु दुसर मैस कै मिलि सकछा?" यैक लिजी राँजल यूसुफ धैं कौ, "परमेश्वरल तुमुमिं यौ बात प्रकट करी। यैक लिजी यां तुमर बारबर समझदार और बुद्धिमान मैस क्वे न्हैं। तुम मिस्र देशक उप-राँज ह्वला! मेरि प्रजा तुमर हुकुमक पालन करलि। केवल मी यौ देश मिं तुमुहै ठुल हूंल।"

तब रॉजल आपण हातकि मुनड़ि निकालिबेर यूसुफ कैं दे और उकैं एक बढिया-बढि मलमलक कुर्त पैरा। और वीक गव मिं एक सुनक हार लै खितौ। रॉजल यूसुफ धैं कौ, "मी रॉज छूं लेकिन तुमर हुकुमक बिन मिस्र देश मिं के नि है सकन।" रॉजल यूसुफक नाम "सापनथ-पानेह" धरौ, यैक अर्थ छु, "परमेश्वर ज्यून छु और उं बात करनी।" वील ओन नगरक पुरोहित पोटीफेरकि चेलि आसनतक दगाड़ वीक ब्या करि दे। इसिक यूसुफ कैं मिस्र देश मिं अधिकार मिलौ।

जब यूसुफल मिस्र देशक रॉजक सेवा करण शुरु करी, तब उ तीस सालक छी। उ रॉजक दरबार बे ऐबेर पुर मिस्र देश मिं घुमण लागौ। यूसुफ रथ मिं भैबेर हर जाँग जांछी और वीक अधिल बे मैस यौ बतूणक लिजी जांछी कि "खबरदार, उप-रॉज उणौ!" और यौ सुणिबेर सब मैस उकैं पैलाग करछी।

सुकालक सात सालों मिं, गाँड़ों मिं भौत जादे अनाज पैद हौ। तब यूसुफल हरेक नगरक गाँड़-भिड़ों बे अन्न जॉम करवा। यूसुफल समुद्रक धूलक समान अन्न जॉम करवै ले। यां तलक कि बाद-बाद मिं वील उ अनाज कैं तोलण लै छोड़ि दे, किलैकि उकैं नाँपण लै भौत मुश्किल छी।

यूसुफकि स्यैणिल अकाल उण है पैली यूसुफॉक द्वी च्यालों कैं जनम दे। यूसुफल आपण ज्यठ च्यलक नाम मनशशे धरौ, किलैकि उ कूँछी, "परमेश्वरल म्यार दुःख दूर करि हैली और म्यर परिवारॉक दुखों कैं लै भुलै है।" वील दुसर च्यलक नाम एफ्राइम धरौ किलैकि उ कूँछी, "परमेश्वरल मिकैं उ देश मिं फलवंत करौ, जमिं मील भौत दुःख ठेल रॉखछी।"



रॉजक सामणी यूसुफ

मिस्र देश मिं सुकालक सात साल पुर हई, और आँब सात सालक अकाल शुरु हुण लागौ, जस यूसुफल कैं रॉखछी। जब मिस्र देशक मैसों कैं भूक-मरी है, तब उं रॉजक सामण अन्नक लिजी डाड़ मारण लागीं। रॉजल उनुकैं यौ कैबेर यूसुफक पास भेजौ कि जस उ कौल, उस करिया। तब यूसुफ अनाजक गोदाम

खोलिबेर उ अन्न बेचण लागौ। यूसुफक पास दुसॉर देशोंक मैस लै अन्न खरीदणक लिजी उणाछी, किलैकि पुर धरति मिं भयंकर अकाल छी।

यूसुफाँक भै वीक पास उंनी

(उत्पत्ति ४२:१-२८)

एल जब कनान देश मिं लै यौ अकाल पड़ि रौछी, तब याकूब कै पत्त लागौ कि मिस्र देश मिं अनाज छु। तब वील आपण च्यालों धै कौ, "तुम एक दुसरक मूख किलै चाणाछा? मील सुणौ कि मिस्र देश मिं अनाज छु। तुम वां जाओ और खाँणक लिजी अनाज खरीदिबेर ल्याओ, जैल हम ज्यून रूँल।"

यैक लिजी याकूबाँक च्याल लै दुसॉर देशोंक मैसोंक चारि मिस्र देश मिं अनाज खरीदणक लिजी ऐ राछी। लेकिन याकूबल यूसुफक नाँन भै बिन्यामीन कै उनर दगाड़ नि भेजि राँखछी, किलैकि उ डरछी कि कै बिन्यामीन मिं क्वे मुशीबत नि ऐ पड़ो।

यूसुफ मिस्र देशक उप-राँज छी, और उ सब देशोंक मैसों कै अनाज बेचछी। यूसुफाँक भै लै वीक सामण आई और उनुल चौड़ हबेर यूसुफ कै पैलाग करौ। जब वील आपण भैनों कै देखौ, तब उनुकै पछ्याण ले पर उनुल नि पछ्याण। तब यूसुफल उनर दगाड़ अपछ्याणक चारि बात करी। वील उनुधै जोर-जोरल पुछौ, "तुम को छा, और कांबे ऐ राछा?" उनुल जबाब दे, "हम अनाज खरीदणक लिजी कनान देश बे ऐ रयूं।"

और तब यूसुफ कै आपण स्वीण याद आ, जो वील आपण भैनोंक बारि मिं देखि राँखछी।

वील उनुधै कौ, "तुम लोग जासूस छा, और मिस्र देशक भेद लिणक लिजी ऐ राछा।" उनुल यूसुफ धै कौ, "नै, नै, मालिक, हम तुमर दास छूं और यां सिरफ अनाज खरीदणक लिजी ऐ रयूं। हम सब भै छूं। हम सांचि कूणयूं कि हम जासूस न्हैतियूं!" लेकिन यूसुफल कौ, "ना, तुम मिस्र देशक भेद लिणक लिजी ऐराछा।" उनुल फिर कौ, "ना, हम बार भै छूं। और हमर घर कनान देश मिं छु, हमर सबों है नाँन भै बौज्यूक दगाड़ घर मिं छु। और एक भै आँब नि रौय।"

यूसुफल उनुधै कौ, "जो बात मील तुमुधै कै उ सांचि छु, तुम जासूस छा। तुमर पूछताछ करी जालि। मी राँजकि कसम खाँनू कि जब तलक तुमर नाँनवाँल भै नि आल तब तलक तुम यां बे नि जै सकना। तुम आपुं मिं बे एक भै कै घर भेजो कि उ तुमर भै कै लिबेर आओ। तब तलक तुम बन्दी रौला।

यैल तुमेरि बातकि पूछताछ करी जालि कि तुम सांचि छा या झुट। रॉजक जीवनक कसम तुम जासूसै छा!"

तब यूसुफल उनुकै तीन दिन तलक जेल मिं धरौ।

तीन दिनक बाद यूसुफल उनुधैं कौ, "मी परमेश्वर कैं माननू, यैक लिजी मी तुमुकैं यौ साबित करणक एक मौक दिंनू कि तुम सांचि कूणाछा। तुम यौ साबित करो और मी तुमुकैं ज्यून रुण द्यूंल। अगर तुम सांचि मैस छा, तब तुमुमिंभे एक भै जेल मिं रओ और बकाइ सब भै आपण परिवारक लिजी अनाज लिबेर जाओ। लेकिन तुम आपण सबों है नॉन भै कैं म्यर सामण लिबेर आया। इसिक तुमेरि बात लै सांचि होलि और तुम मरण है बचि जाला।"

तब भैनॉल आपस मिं बात करिबेर कौ, "सांचि मिं हम आपण भै यूसुफक प्रति कसूरदार छूं। जब वील हमुधैं दयाकि भीख मांगी, तब हमुल वीक दुःख देखौ लेकिन हमुल के नि कर। आँब हमुधैं वीक दुःखक बदाव ली जॉल।" रूबेनल उनुधैं कौ, "के मील तुमुधैं नि कौछिया कि यूसुफक खिलाफ पाप नि करो? पर तुमुल मेरि बात नि सुणि। आँब हमुकैं यैक सजा मिलेलि।"

यूसुफ और उनरि बीच बात-चीत एक तिसर आदिमक जरियल हुंछी, जो उं द्विनॉकि बात समझछी। इसिक उनुकैं यौ बातक पत्त नि चल कि यूसुफ उनरि भाषा कैं समझुं। यूसुफ उनर सामण बे पलिकै जैबेर डाड़ मारण लागौ। जब उ फिर उनर सामण आ तब वील शिमोन कैं उनर सामण बदवैबेर बन्दी बणै ले।

तब यूसुफल आपण दासों कैं हुकुम दे कि भैनॉक बोरियों मिं अनाज भर दियो और हर एकक रुपैं लै उनार बोरियों भितेर धरि दिया। और उनुकैं बाँटक लिजी खाँण लै दिया। उनुल उसै करौ।

यूसुफाँक भै अनाजक बोरि आपण आपण गधों मिं लादिबेर वां बे जानै रई। बाँट मिं, जब उं रात बितूणक लिजी रुकीं, तब उनुमिं बे एकल आपण गधा कैं चार दिणक लिजी बोरि खोलौ। तब वील वैं आपण रुपैं देखीं! वील आपण भैनॉ कैं बुलैबेर कौ, "अरे, देखौ म्यार रुपैं यैं छन! यौ म्यर बोरि मिं छी!" यौ सुणिबेर उं सब डरि पड़ीं और एक-दुसरक मूख चाण लागीं, कि परमेश्वरल हमर दगाड़ यौ के करौ?

भै आपण घर पुर्जी

(उत्पत्ति ४२:२६-३८)

जब उं कनान देश मिं आपण बौज्यूक पास पुर्जी तब उनुल कौ, "मिस देशक उप-रॉजल हमर दगाड़ भली कैं बात नि करी। वील हमुकैं उ देश

मिं जासूस समझौ। लेकिन हमुल कौ, "हम सांचि मैस छूं, हम क्वे जासूस न्हैतियूं। हम बार भै यक्कै मैसक च्याल छूं। हमर एक भै आँब ज्यून न्है। और एक भै हमर बौज्यूक दगाड़ कनान देश मिं छु।" तब उ देशक उप-रॉजल हमुधैं कौ, "अगर तुम यौ काम करला, तब मी मॉन ल्यूल कि तुम सांचि मैस छा। तुम आपण भैनों मिंभे एक कै म्यर पास छोड़ि जाओ और बाकि आपण पुर परिवारक लिजी अन्न लिबेर जाओ। और आपण नॉन भै कै म्यर पास लिबेर आओ। जब मिंकेँ भरौस ह्वल कि तुम जासूस न्हैता, तब मी तुमर यौ भै कै लै छोड़ि द्यूल, और तुम हमर यौ देश मिं धंध लै करि सकला।"

जब उनुल आपण अन्नक बोरि खोलीं तब उनुल आपण-आपण रूपैक थैल लै बोरियों मिं देखीं। उं सब डरि पड़ीं। याकूबल कौ, "तुमुल मिंकेँ बे-औलाद करि है! यूसुफ तो नि रौय, आँब शिमोन लै न्है, और तुम बिन्यामीन कै लै ली जाणकि बात करणाछा! यौ सब परेशानी मिं पर ऐ रै।" रूबेनल आपण बौज्यू धैं कौ, "अगर मी बिन्यामीन कै वापिस नि ल्यूल, तब तुम म्यर द्विवै च्यालोंक गव काटि दिया। पर ऐल तुम तकै मिंकेँ सौप दियो। मी तकै तुमर पास जरूड़ वापिस लूल।" लेकिन याकूबल कौ, "बिन्यामीन तुमर दगाड़ कतई नि जाओ। वीक भै यूसुफ तो मरि गो, आँब यौ यकलै बचि रौ। मी बुड़ छूं, और अगर बाँट मिं बिन्यामीन मिं क्वे परेशानी आलि तब मी यौ दुःखलै मरि जूल।" ¹

याकूबाँक च्याल दुबार मिस्र जानै

(उत्पत्ति ४३:१-१५)

कनान देश मिं आजि तलक भयंकर अकाल छी। जो अन्न याकूबाँक च्याल मिस्र देश बे पैली ल्यै राछी, उ खतम हुणक बाद याकूबल उनुधैं कौ, "तुम दुबार मिस्र देश जैबेर हमर लिजी आजि अन्न खरीद ल्याओ। लेकिन यहूदाल आपण बौज्यू धैं कौ, "मिस्र देशक उप-रॉजल हमुकेँ समझैबेर कै रॉखछी कि जब तलक तुमर दगाड़ तुमर नॉन भै नि ह्वल तब तलक तुम म्यर पास नि आया। अगर तुम हमर दगाड़ बिन्यामीन कै लगूछा, तब हम मिस्र देश जैबेर तुमर लिजी अनाज मोल ल्यूल। अगर तुम बिन्यामीन कै नि भेजना, तब हम लै वां नि जै सकन।"

याकूबल कौ, "तुमुल उ मैस कै यौ बात बतैबेर कि हमर एक भै आइ छु, म्यर लिजी भौत मुशीबत पैद करि है।" लेकिन उनुल कौ, "उ मैसल हमर

¹ यूसुफ और बिन्यामीन याकूबक स्येणि राहेलक च्याल छी जकै उ भौत जादे प्यार करछी। उ बिन्यामीन कै जनम दिण बखत मरि गेछी। दुस्रि च्याल याकूबाँक और स्येणियोंक छी।

और हमर परिवारक बारि मिं हमुधैं चालाकिल सब बात पत्त करी। वील यौ लै पुछौ कि तुमर बौज्यू आइ ज्यूने छना? के तुमर एक भै आइ छा? जो-जो वील पुछौ, हमुल वीक जबाब दे। हमुकें के पत्त छी कि उ कौल, "आपण नॉन भै कै यां ल्याया?"

यहूदाल आपण बौज्यू धैं फिर कौ, "बिन्यामीन कै म्यर दगाड़ भेजि दियो। तब हम सब भै मिस्र देश जानू जैल तुम, हम और नॉनतिन बचि सको। बिन्यामीनक हिफाजतकि जवाबदारी मी लिनू। अगर मी यकै तुमर पास वापिस नि पुजूल, तब हमेशा तलक तुमर कसूरदार रूल। अगर हमुल इतुक देर नि करि हुंछी, तब हम ऐल तलक मिस्र देश बे अन्न लिबेर तिबार वापिस यां ऐ जांछी!"

आखिर मिं याकूबल उनुधैं कौ, "ठिक छु। यौ बार तुम कनान देशक सब महेंग-महेंग चीजों कै जस इत्र, धूप, मश्याल, मौ, पिस्त और बदाम लिबेर मिस्र देशक उप-रॉजक लिजी भेट ली जाया। वीक अलावा तुम पैलियक है दुगुण डबल ली जाया। और जो रुपैं तुमार बोरियों मिं वापिस ऐ राछी, उ रुपैं लै वापिस ली जाया। है सकुं कि पैली बार उनर गलितल उं वापिस तुमर पास ऐ गई। तुम बिन्यामीन कै लिबेर फटाफट मिस्रक उप-रॉजक पास जाओ। सबों है ठुल परमेश्वरक जरियल उ मैसक दया तुमु पर हो, जैल उ तुमर भै जो वीक पास बन्दी छु और बिन्यामीन सहित तुम सबों कै अनाज दिबेर वापिस लै लगै दियो।"

तब यूसुफॉक भै बिन्यामीन, भेट, और रूपैनों कै लिबेर मिस्र देश मिं यूसुफक पास पुर्जी।

भै यूसुफक महल मिं

(उत्पत्ति ४३:१६-३४)

जब यूसुफल आपण भैनों कै फिर देखौ, और उनर दगाड़ बिन्यामीन कै लै देखौ, तब वील आपण घरेलू अधिकारी धैं कौ, "इनुकै महल मिं ली जाओ और बाकर काटिबेर खाँण तैय्यार करो। आज यौ सब म्यर दगाड़ खाँण खाल।" जस यूसुफल कौ वील उसै करौ। उ उनुकै यूसुफक महल मिं ली गो।

तब उं सब भै डरि पड़ीं किलैकि उनुकै यूसुफक महल मिं ली जाई जाणौछी। उनुल आपस मिं कौ, "जो रुपैं पैली बार हमर बोरियों मिं धरि रॉखछी, वीक कारणल हमुकै यां लाई गो, जैल उं हमुमिं दोष लगै सको और हमुकै गुलाम बणैबेर हमार गधों कै लै छड़ै ल्याल।"

यैक लिजी उनुल यूसुफक घरेल अधिकारीक पास जैबेर बात-चीत करी। उनुल कौ, "हे हमर मालिक, हम पैली अनाज खरीदणक लिजी लै ऐ राछी। और जब वापिस जाणाछी तब बाँट मिं हमुल आपण खाँणक लिजी अनाज निकालण पर रुपैं वैं देखीं, उ बोरि भितैरे छी। यौ कारणल हम उ रकम कैं आपण दगाड़ वापिस लै रयूं। और हम अनाज खरीदणक लिजी आइ रकम लिबेर लै ऐ रयूं। हम नि जाणन कि उ डबल हमार बोरियों मिं कैल धरीं।"

लेकिन वील कौ, "डरिया झन, बेफिकर रओ। तुमार डबल तो मिक्कें मिलि ग्याछी। तुम और तुमर बौज्यूक परमेश्वरल उ डबल तुमार बोरियों मिं धरि हवाल।" तब उ शिमोन कैं निकालिबेर उतर पास ला।

फिर उ मैसल उनुकें यूसुफक महल मिं ली जैबेर पाणि दे, जैल उनुल आपण खुट ध्वेई। वीक बाद वील उनार गधों कैं चार ले दे। तब उनुल यूसुफक उण है पैली आपणि भेट वीक लिजी तैय्यार धरीं, किलैकि उनुकें पत्त छी कि आँब यूसुफ उणी छु।

जब यूसुफ महल मिं आ, तब उ आपण भेट लिबेर वीक पास गई और चौड़ हबेर पैलाग करौ। यूसुफल उनेर घरकि खबर-बाद पुछी, कि तुमर बौज्यू काँस है रई? के उ आइ छनै छिना? उनुल जबाब दे, "हमार बौज्यू ठिक-ठाक छन।" तब उनुल फिर चौड़ हबेर यूसुफ कैं पैलाग करौ।

यूसुफल मेलिबे चैबेर आपण शांककै भै बिन्यामीन कैं देखिबेर उनुधैं पुछौ, "के यौ तुमर सबों है नॉन भै छा, जैक बारि मिं तुमुल बताछी?" वील बिन्यामीन धैं कौ, "च्यला, परमेश्वर तुकें खूब आशीश दियो।" तब वीक बाद यूसुफ उलबे जल्दी उठौ, किलैकि आपण नॉन भै कैं देखिबेर वीक गव भरी आ। उ उठिबेर आपण कम्र मिं ऐबेर डाड़ मारण लागौ। फिर उ मूख ध्वेबेर भ्यार आ, और वील हुकुम दे कि खाँण लगाओ।

यूसुफक भै वीक सामण आपण उमरक हिसाबल भैटाई गई। सबों है पैली ज्यठ और आखिर मिं निकांस्सै। उ यौ देखिबेर ताजुबल एक-दुसरक मूख देखण लागीं।

उतर लिजी नौकर यूसुफक मेज बे खाँण लिबेर आ, लेकिन बिन्यामीन कैं सबों हबेर पांच गुण जादे मिलौ। फिर उ सबोंल खा-पी और आनंद मना।

यूसुफ आपण भैनों कैं परखूणौ

(उत्पत्ति ४४:१-१३)

यूसुफल आपण घरक अधिकारी कैं हुकुम दिबेर कौ, "यौ मैसोक बोरियों मिं इतुक अन्न भर दियो, जतुक यौ ली जै सकनी। और हरेकाँक रुपैं लै

वीक बोरि मिं वापिस धरि दिया। और म्यर चांदिक गिलास कै उनर सबों है नॉनवॉल भैक बोरि मिं अनाज और डबलोक दगाड़ धरि दिये।" तब वील उसै करौ।

और वीक बाद रात्ति उज्याव हुण पर भैनों कै उनर समान और गधोंक दगाड़ विदा करी गो। यैक थवाड़ बाद यूसुफल आपण अधिकारी धैं कौ, "जाओ, उनर ख्याद पड़ो और जब उनर पास पुजला, तब उनुधैं कया, "तुमुल हमेरि भलाइक बदाव हमर दगाड़ बुराइ किलै करी? तुमुल हमर मालिकक चांदिक गिलास चोरि किलै करौ? उं उ गिलास मिं पाणि पिंछी और भविष्यबाणी लै करछी!"

तब नौकरल उनर पिछ करिबेर उनुकै पकड़ि ले और यौ सब बात वील उनुधैं कै।

तब यूसुफॉक भैनोंल उधैं कौ, "हे मालिक, तुम यस किलै कूणाछा? देखो, हमुकै पैली बारक जो रुपैं हमार बोरियों मिं मिली, हम उनुकै लै कनान देश बे तुमर पास वापिस लिबेर आयूं। फिर हम आपण मालिकक घर बे सुन या चांदिक चोरि किलै करुन? तुम हमार बोरियों कै खोलिबेर देखो और जैक बोरि मिं तुमुकै उ गिलास मिलल तुम उकै मारि दिया और हम सब भै लै तुमर गुलामी करुल।" तब यूसुफक अधिकारील कौ, "जस तुम कूछा, मी उसै करुल, लेकिन सिरफ उ मैस हमर दास हवल जैक पास उ गिलास मिलल,

और सब आजाद हवाल।" यौ सुणिबेर उं सब भैनोंल सरासरि आपण-आपण बोरियों कै भिं मिं खोलि दे।



बिन्यामीनक बोरी बे रॉजक गिलास मिलूं

तब यूसुफक नौकरल उं सब भैनोंक बोरियों मिं चाण शुरु करौ और उकै बिन्यामीनक बोरि मिं यूसुफक गिलास मिलौ।

और यौ देखिबेर कि बिन्यामीनक बोरि मिं गिलास मिलौ उं सब भैनोंल आपण-आपण लुकुड़ फाड़िबेर शोक मना और उं बोरियों कै गधों मिं दुबार लादिबेर नगरक तरफ वापिस लौटीं।

बिन्यामीनक लिजी बिनती

(उत्पत्ति ४४:१४-३४)

यैक बाद फिर यूसुफाँक भै वीक महल मिं लौट आई। यूसुफ वैं छी, और उं वीक खुटॉन मिं पड़ीं। यूसुफल उनुधैं कौ, "तुमुल यौ कस काम करौ? के तुम यौ नि जाणछिया कि मी हरेक भेदोंक बारि मिं जाणनू?" यहूदाल यूसुफ धैं कौ, "हम आपुं कै बेकसूर कसिक ठैरूनू? परमेश्वर हमर आज तलकक सब पापोंक सजा हमुकै दिणौ। आँब हम सब तुमार गुलाम छूं।"

लेकिन यूसुफल उनुधैं कौ, "ना, ना, केवल उ म्यर गुलाम बणल जैक पास म्यर गिलास मिलौ और बाकि तुम लोग भली कै आपण घर जाओ।"

तब यहूदाल यूसुफक नजिक ऐबेर उधैं कौ, "हे म्यर स्वामी, किरपा करिबेर आपण यौ सेवक कै के कूण दियो। मी तुमुकै यौ बतूण चां लेकिन तुम मि पर नराज नि होया, किलैकि तुम रॉजक बराबरक छा। म्यर मालिक, तुमुल आपण यौ सेवक धैं यस पुछछी कि त्यर बौज्यू और दुसाँर भै छिना? तब हमुल तुमुकै बताछी, "हमार बौज्यू बुड़ छन और उनर बुढ़ापाक एक च्यल छु। उ हमर सबों है नॉन भै छु और वीक एक शांक तुल भै मरि गो। और आँब उ आपण इजक औलादों मिं बे एकलै बची छु, यैक लिजी हमार बौज्यू उकै सबों है जादे प्यार करनी।" यौ सब सुणणक बाद तुमुल हमुकै यौ हुकुम देखी, कि उकै म्यर पास ल्याया, जैल मी उकै देखि सकुं। हमुल आपण स्वामी धैं कौछी, "उ लौंड आपण बौज्यू कै नि छोड़ि सकन। अगर उ यस करल, तब वीक बौज्यू मरि जॉल।" तब तुमुल हमुकै चिताक करै हैछी, कि जब तलक तुमर दगाड़ तुमर नॉन भै नि आल तब तलक तुम म्यर दगाड़ भेट नि करि सकना। हम आपण बौज्यूक पास गोयूं और उनुकै तुमेरि बात बतै। जब हमर बौज्यूल कौ, "मिस्र देश जाओ और हमर लिजी अन्न खरीदिबेर ल्याओ," तब हमुल कौ, "हम नि जै सकन। अगर हमर सबों है नॉन भै हमर दगाड़ नि ह्वल, तब हम मिस्र देशक उप-रॉजक दगाड़ भेट नि करि सकन।" हमार बौज्यूल हमुधैं कौ कि तुम तो जाणछा कि मेरि स्यैणि राहेलल मिंबे द्वी च्यालों कै जनम देखी। एक च्यल मिंके छोड़िबेर जानै रौ। यौ पक्क छु कि उकै मारि दी ह्वल, किलैकि तब बटी मील उकै कभै दुबार नि द्यख। अगर तुम यकै लै म्यर दगाड़ बे ली जाला और यै पर क्वे मुशीबत ऐ पड़ेलि, तब तुम यौ शोकक दगाड़ मी बुड़ कै मारि द्यला।

ऑब अगर हम यकै यै छोड़िबेर आपण बौज्यूक पास वापिस जूल और जब उं यकै हमर दगाड़ नि देखॉल, तब उं पक्क मरि जॉल। किलैकि उनार प्राण तो यौ लौंड मिं अटकी छन। मील आपण बौज्यू धैं यौ लौंडक हिफाजतक वैद यौ कैबेर करि रॉखौ, कि अगर मी यकै तुमर पास वापिस नि ल्यूल, तब मी उमर भर तुमर कसूरदार रूल। यैक लिजी दया करिबेर ऑब तुम हुकुम दियो कि यौ लौंडक बदाव, मी तुमर गुलाम बणिबेर रुं और तुम यौ लौंड कैं आपण भैनोंक दगाड़ घर वापिस जाण दियो। अगर यौ लौंड हमर दगाड़ नि ह्वल, तब हम आपण बौज्यूक पास कसिक जूल? किलैकि मी आपण बौज्यूक दुःख नि देखि सकन।"

यूसुफ आपण हकीकत बतूणौ

(उत्पत्ति ४५:१-१५)

तब यूसुफ आपुं कैं और नि रोक सक, और वील आपण सब कामदारों धैं जोरल कौ, "भ्यार जाओ!" फिर वील आपण भैनों धैं कौ, "मी तुमर भै यूसुफ छूं!" और उ इतुक जोरल डाड़ मारण लागौ कि जो भ्यार छी उनुल लै वीकि अवाज सुणी। यूसुफल आपण भैनों धैं फिर कौ, "मी यूसुफ छूं, के म्यार बौज्यू ज्यून छिना?" वीक भैनोंल उकैं के जबाब नि देय किलैकि उं डरणाछी। यूसुफल आपण भैनों धैं कौ, "म्यर पास आओ! मी सांचि मिं तुमर भै यूसुफ छूं, मिक्कै तुमुल मिस्र देश उणी ब्यापारियोंक हात बेचछी।

ऑब तुम दुःखी नि हो और न आपुं देखि रीश करो कि तुमुल मिक्कै बेचौ। पर परमेश्वरल जिन्दगियों कैं बचूणक लिजी मिक्कै यां भेजौ। ऐल सब जांग द्वी साल बे अकाल पड़ि रौ, आजि पांच साल तलक रौल। यस मिं न यां कैं बल्द जोतियाल, और न फसल काटियेलि। परमेश्वरल तुमुहै पैली मिक्कै यां भेजि रॉखौ कि तुम और तुमार नॉनतिनोंक वंशक धरति मिं हिफाजत करी जाओ और तुमेरि औलादों कैं बचाई जाओ। यैक लिजी मिक्कै तुमुल यां नि भेज पर परमेश्वरल भेजौ। और उनुलै मिक्कै रॉज कैं राय दिणी, वीक महलक मालिक और पुर मिस्र देशक उप-रॉज बणा।

ऐल ऑब झट्ट करो, और बौज्यूक पास जैबेर उनुधैं कया कि तुमर च्यल यूसुफ यस कूणौछी कि परमेश्वरल मिक्कै पुर मिस्र देशक मालिक बणै रॉखौ, यैक लिजी वांबे जल्दी म्यर पास यां ऐ जाओ। तुम म्यर नजिक गोशेन प्रदेश मिं रौला - तुम, तुमार नॉनतिन, तुमार गोरु-बाँछ, और यैक अलावा जो तुमर पास छु उनुकैं लिबेर यां आओ। यां मी तुमर लिजी अन्न-पाणिक इंतजाम

करुंल, किलैकिक अकालक पांच साल आइ बची छन। यां तुम, तुमर परिवार और तुमार दगाड़क मैसोंक लिजी के कमी-पेशी नि ह्वेलि।

देखो, तुमुल और बिन्यामीनल देखि रॉखौ कि तुमार दगाड़ बात करणी मी यूसुफ छु। तुम बौज्यू कैं मिस्र देश मिं म्यर ठुल पदक बारि मिं बताया। और जे के लै तुमुल देखौ, वीक बारि मिं लै उनुकैं जरूड़ बताया। आँब जल्दी करिबेर बौज्यू कैं यां लिबेर आओ!" तब यूसुफ और बिन्यामीन एक दुसर कैं और उ दयाल भरी ग्याय हालिबेर डाड़ मारण लागीं।

यूसुफल आपण सब भैनों कैं चुमौ और उनुकैं अडाव हालिबेर डाड़ मारी। फिर उं सब आपस मिं बातचीत करण लागीं।

रॉजक न्यूत

(उत्पत्ति ४५:१६-२८)

जब रॉजक महल मिं यौ खबर पुजी कि यूसुफाँक भै ऐ रई, तब उं और वीक सब दरबारी खुशि हई। रॉजल यूसुफ धैं कौ, "तुम आपण भैनों धैं कया कि उं आपण गधों मिं अन्न लादिबेर कनान देश जाओ। और जैबेर बौज्यू और आपण परिवार कैं लिबेर म्यर पास आओ। मी उनुकैं मिस्र देशक सबों है भल जाँग रुणक लिजी द्यूंल, और उं मिस्र देशक सब भल-भल खाँण खाल। उनुधैं कवो कि उं आपण बौज्यू, नॉनतिनों और स्यैणियोंक लिजी मिस्र देशकि गाड़ि लिबेर जाओ और उनुकैं उमिं बैठेबेर ल्याओ। उं आपण समानकि फिकर नि करो, किलैकिक मिस्र देशक सब भलि-भलि चीज उनेरि छु।"

तब याकूबाँक च्यालोल यस्सै करौ। यूसुफल रॉजक हुकुमक अनुसार उनुकैं गाड़ि दे और बाँटक लिजी खाँण लै दे। यूसुफल आपण भैनों कैं एक-एक ज्वड़ लुकुड़ देई पर बिन्यामीन कैं चाँदिक तीन सौ सिक्कोंक दगाड़ पांच ज्वाड़ लुकुड़ देई। वील आपण बौज्यूक लिजी दस गधों मिं मिस्र देशक सब भलि-भलि चीज, और दस गधियों मिं अन्न और र्वाट लादिबेर भेजीं, और उनर अलावा बाँटक लिजी खाँण-पिण लै दे। और जब उं जाण लागीं यूसुफल उनुधैं कौ, "बाँट मिं झगड़ नि करिया।"

उं मिस्र देश बे जाने रई, और आपण बौज्यू याकूबक पास कनान देश मिं आई। उनुल आपण बौज्यू कैं बता, "यूसुफ ज्यून छु! उ पुर मिस्र देशक उप-रॉज छु!" यौ सुणिबेर याकूब कैं के कूण नि आय, और वील उनरि बातों मिं भरौस नि कर।

लेकिन जब यूसुफाक भैनोंल आपण बौज्यू कै सब बात बतै जो यूसुफल उनुधै कै राखछी, और जब याकूबल उ गाड़ियों कै देखौ जो यूसुफल भेजि राखछी, तब याकूब खुशि हौ। वील कौ, "ऑब मिक्कै भरौस है गो कि म्यर च्यल यूसुफ ज्यून छु! मी मरण है पैली वां जैबेर यूसुफक दगाड़ जरूड़ भेट करुंल!"



भै आपण घर वापिस जाणई

याकूब मिस्र उणौ

(उत्पत्ति ४६:१-६, ४७:२७)

यैक लिजी याकूब आपण परिवार और सारि धन-दौलत कै लिबेर मिस्र देशक लिजी बाँट लागौ। जब उं बेशेबा पुजीं तब याकूबल परमेश्वर कै भेट चढ़ै।

परमेश्वरल रात मिं याकूब कै दर्शन दिबेर कौ, "याकूब, याकूब!" वील कौ, "हो!" परमेश्वरल कौ, "मी वी परमेश्वर छूँ जकै त्पर बौज्यू और तु लै मानछै। तु मिस्र देश जाणक लिजी नि डर, किलैकि मी वां त्पर जरियल एक ठुल देश बणूँल। मी त्पर दगाड़ मिस्र देश ऊँल और वांबे तुकै दुबार वापिस ल्युँल। और जब तु मरलै तब यूसुफ त्पर आँखों कै बन्द करल।"

कनान देश बे आपण च्याल-चेली, नाति-नातिणी, गोरू-बाँछ, भेड़-बकॉर और सब समान कै लिबेर याकूब वां पुजौ। उं गोशेन प्रदेश मिं रुण लागीं, और वां उं खूब फल-फुलबेर भौतै जादे बढ़ीं।

याकूबकि आखिरी मंशा

(उत्पत्ति ४७:२८-३१, ५०:१५-२१)

याकूबल सत्र साल मिस्र देश मिं बिताई। वीक पुर उमर एक सौ सैंतालीस सालकि है। जब वीक मरणक बखत नजिक आ, तब वील आपण च्यल

यूसुफ कैं बुलैबेर कौ, "अगर तु मेरि इज्जत करछै, तब कसम खा कि जब मी मरुल, तब तु मिक्कै मिस्र देश मिं दफन नि करलै। लेकिन मिक्कै मिस्र देश बे लिजैबेर म्यर पुरखोंक दगाड़ कबर मिं दफनाये।" यूसुफल कौ, "जस तुम चांछा, उसै हवल।" लेकिन याकूबल फिर कौ, "तु कसम खा।" और यूसुफल कसम खै। तब याकूबल आपण सिराण मिं टोप मारिबेर परमेश्वर कैं धन्यवाद दे। और यैक बाद याकूब मरि गोय।

याकूबक मरणक बाद यूसुफाँक भै कूण लागीं, "आँब यूसुफ हमुधैं घीण करल, उ हमर सब बुराइक बदाव हमुधैं ल्यल।" यैक लिजी उनुल यूसुफक पास एक जुबबी भेजिबेर कौ, "तुमर बौज्यूल मरण है पैली यौ हुकुम दी रॉखछी, "यूसुफ धैं कया कि उ दया करिबेर आपण भैनोंक गलित कैं माफ करि दियो, किलैकि उनुल तुमर दगाड़ बुराइ करि रॉखछी।" आँब दया करिबेर आपण भैनोंक पाप माफ करि दियो।" यौ सुणिबेर यूसुफ डाड़ मारण लागौ।

तब भैनोंल यूसुफाँक सामण ऐबेर उधैं कौ, "हम सब तुमार सेवक छु।" लेकिन यूसुफल कौ, "डरो नै, बे फिकर रओ, मी परमेश्वर न्हैंतिन जो तुमर न्याय करुल! तुमुल म्यर लिजी बुराइक योजना बणै, लेकिन परमेश्वरल भलाइक लिजी उकैं इस्तमाल करौ, जैल भौतै मैस ज्यून बचाई गई। यैक लिजी तुम नि डरो, मी तुम और तुमार नॉनतिनोंक देखभाल करनै रूल।" इसिक यूसुफल उनुकैं भरोस दे और प्यारल बात करिबेर उनुकैं हिम्मत दे।

यूसुफक मौत

(उत्पत्ति ५०:२४-२६)

यूसुफल आपण झड़-नाति, पड़-नाति सब देखीं। तब वील आपण भैनों धैं कौ, "म्यर मरणक दिन नजिक ऐे गई लेकिन परमेश्वर तुमेरि सुधि ल्याल, और तुमुकैं यौ देश बे निकालिबेर उ देश मिं ली जॉल जैक वैद उनुल इब्राहीम, इसहाक और याकूबक दगाड़ करि रॉखछी।" यैक बाद यूसुफल आपण परिवार वॉलों कैं कसम खवैबेर कौ, "तुम यांबे म्यार हड़िकों कैं लिबेर जाया।"

तब एक सौ दस सालकि उमर मिं यूसुफ मरौ। उनुल वीक लाश मिं हरेक खुशबुदार इत्र लगैबेर उकैं मिस्र देश बे कनान देश मिं ली जाणक लिजी एक संदूक मिं धरि दे।